

iritzia

gaurko...

...elkarriketa



Marisa Tejedor

IZARO AUTOESKOLAKO
IDAZKARIA

**«Autosim-i esker
ikasleek,
denbora eta
dirua aurrezteaz
gain, gidatzeari
beldurra galtzen
diote»**

Autosim gidatzen ikasteko makina jarri du martxan duela hilabete Bilboko autoeskola horrek.

■ Zer da autosim?

Kotxe baten osagai guztiak dauzka. Hainbat pantailatan gidatzean ohikoak diren egoerak itxuratzen dira, eta horietan eman beharrek erantzunak praktika daitezke. Izan ere, ikasleek bolantearen eta enbragearen erabilera, martxa aldaketa eta beste ezagutu eta kontrolatzen ikas dezakete errepidera atera baino lehen. Ondorioz, inoiz kotxearekin ibili ez direnen hasierako beldurra kentzen da.

■ Orduan, praktika gutxiago egitea dakar?

Lehenengo lau zupabost klaseetan kotxearen oinarriko funtzionamendua irakasten zaie ikasleek %90i. Autosimi esker horiek guztiak aurretik ikas daitezke. Beraz, ikasleek praktika gutxiago egin behar izaten dituzte eta, ondorioz, dirua eta denbora aurrezten dute.

■ Zelako harrera izan du ikasleek artean?

Pozik daude, praktikak hasten dituztenean, errealitateko egoeretara gutxi gorabehera ohitu direlako, eta ez dira hain inseguruak sentitzen. Gainera, erabilerak ezin errazagoa da.

Kristina Martin

BILBO

...esaera

«Umeari lehenengo hortza aurkitzen dionak soineko berria irabazten du»

...hizpideak

Greba 35 orduko lanastearen alde: elkartasuna aldarrikatzen

■ Hego Euskal Herriko langileek atzo egindako lanuztea «historikotzat» jo dute sindikatuak. Milaka eta milaka lagunek bat egin dute deialdiarekin lanaren eta aberastasunaren banaketa eskatzeko. Espero bezala, maiatzaren 21eko protesta «elkartasun greba» izan da eta haren segimenduak ia Hego Euskal Herri osoa geldiarazi du. 35 orduko lanastea hurrengo mendeko aldarrikapen nagusietakoa izango da gizartean. Neurri hori ez da, noski, egun Mendebaldean lan eskasari aurre egiteko modurik perfektuena; bai ordea, errealistena. Izan ere, ez dugu txakur ametsik egin behar neurri horrek den-dena kolpetik konponduko duela pentsatuz. Frantzia, esaterako, Aubry Legeak 57.000 lanpostu sortu

edo ez desagertzeko balio izan du iazko ekainean onartu zenetik. Arau hori gabe zer izango zen zehatz-mehatz esaterik ez dago, baina lehenago patronalak proposatutakoari erreparatzek ez du baikorrak izateko aukera handirik ematen.

Aubry Legearen alde positiboena beste bat da baina: araudiak irauli egin ditu eragile ekonomikoen arteko elkarriketaren kontzeptu zaharkituak, Gobernuak, helburuak eta datak ezarri, negoziatzera eraman baititu enpresari eta sektore guztiak. Ildo horretan, atzoko grebak gurean ere hausnarketa egiteko balio behar luke: gaian erantzukizuna duten guztiak mahaian eseri eta denon artean etorkizuneko lan merkaturaren elkartasunez birplantatzea.

Iritzi publikoaren eragina

■ Armen gaineko kontrola zertxobait areagotuko duen lege bat onartu du EEBBetako Senatuak. Errepublikanoen jarrera aldaketa nabarmentzekoa da, orain arte edozein murrizketaren aurka agertu baita. Baina Columbineko eta tankerako beste zenbait sarraskiren ondoren, armen jabetza mugatzearen alde agertu da EEBBetako iritzi publikoa. Kasu honetan, armen industria boteretsuak baino indar gehiago izan du.

Neurririk gabeko jazarpena

■ Iazko Tourrean *Festina* auziak dopinaren mamua azaleratu zuenetik, ezer ez da berdin txirrindularitzan. Gertaera hark kirol honetan gauza asko zuzendu behar direla agerian utzi zuen: giza-kiaren neurrira eginiko txirrindularitza behar dela, ehunka kilometro eta dozenaka mendate eroen abiaduran egiteko espagetiak baino zerbait gehiago behar dela... dopina halabeharrez zabaldua dagoela. Horri konponbidea jartzeko-

an, ordea, agintariek ez dute asmatu. Txirrindulariak gaizkiletzat hartzen dituzten legeak jarri dituzte indarrean. Gaur bai eta bihar ere bai, ate joka dituzte goizeko ordu txikietan odol kontrolak egiteko, UCI, Federazioa, NBO edota Polizia den jakin gabe. Kontrolak beharrezkoak dira, baina erakunde bat ardura dadila lan horretaz. Ziklistak aspertuta daude, eta, egoera hau zuzendu ezetan, greba orokorra egin dezakete horiek ere.

...pertsonaiak



urteurrenean.

PAKO IRIONDO • Euskal Mendizale Federakundeko presidentek Euskal mendizaletasunaren egoera sendoa azpimarratu du Federakundearen 75.



tzaundi Forumean.

ANJEL LERTXUNDI • Euskararen inguruko sakralizazioak ekar lezakeen akritizismoaz eta hori gainditu beharraz aritu zen idazle oriota-rra Tolosako Gal-



argitaletxeak bi liburu kaleratuko dizkio.

URBANO TAVARES • 38 urteko ibilbide literarioa duen idazle portugaldar honek gizakiaren sendotzea du helburu nagusi, bere hitzen arabera. Txalaparta

...datua

XV. eta XVI. mendeetako musika interpretatuko du Hondarribiko Eskifaia abesbatzak **Joaquín Pildain** gogoratuz programaren barnean.

...adierazpena

«Indonesiako Suharto diktadore ohiaren atxiloketa bultzatuko dugu, genozidioagatik»

Jose Ramos-Horta

1996ko Bakearen Nobel Saria

... seiko urrea

INAKI IRAZABALBEITIA

Porlan berria



tsezkoak izango diren —diren, esan behar nuke— bi gertakari izan dira.

Asteartean PNV-EAJ, EA eta EH alderdiek legealdi honetarako oinarritzko adostasun-testua hitzartu dute, bizi garen garai honetarako zutarri izango den lankidetzagiroa hitzez jasotzen duena. Egun berean, ordu berean, «Bai Euskarari Akordioa» izenpetzen ari ziren Hego Euskal Herriko 647 eragile sozial; euskal gizartearen oinarri-oina-

rrizko egiturak, beraz, euskararen normalizaziorako urrats ausarta, ilusioz beterikoa egiten ari ziren. Bigarren jazoera hau aurrekoa baino irispide luzeagokoa iruditzen zait, ez baitago unean uneko koiuntura politikoaren menpe eta inguruko baldintza sozio-politikoek eragingo badiote ere, luze irauteko xede garbia adierazten duelako. Alderdi politikoek sinatu dutena ere molde berekoa izatea nahi nuke, noski, baina ez da hori

antzematen hain erraza. Tamalez, euskararen aldeko pauso historiko honek ez du dagokion eta zor zaion entzute mediatikoa lortu eta beldur naiz ez ote den ia oharkabean pasatuko.

Halakoxea da gure Euskal Herria, paradoxaz beterikoa. Euskararen aldeko puntuak izenpetu dituzten alderdiek ez dute kontuan izan gizarte-mugimendua azken hilabete hauetan jorratzen ari den prozesua, eta aintzat ez hartze horrek berez dagokion protagonismoa kentzea eragin du. Nire irudiko, gertatu denak kalte handia egin digu gizarteak bere egitura politikoekin, eskuz esku, lan egin behar duela aldarrikatzen dugunoi. Ez al zen hori eraikuntza-lan honetan behar genuen porlan berria?